



Centralna banka
BOSNE I HERCEGOVINE
Централна банка
БОСНЕ И ХЕРЦЕГОВИНЕ



Komentar kretanja u sektoru nebankarskih finansijskih institucija na kraju 2025. godine



Analiza finansijskog sektora u BiH na kraju 2025. godine

Na finansijskom tržištu Bosne i Hercegovine, na kraju 2025. godine poslovalo je 127 finansijskih institucija koje su obuhvaćene redovnom statistikom Centralne banke Bosne i Hercegovine. U okviru bankarskog sektora poslovala je 21 banka i jedna razvojna banka, dok sektor nebankarskih finansijskih institucija (u daljnjem tekstu: sektor Ostalih finansijskih institucija – OFI) obuhvata 24 društva za osiguranje i jedno društvo za reosiguranje, 27 mikro kreditnih organizacija, 41 investicioni fond, 4 lizing društva, 6 brokerskih kuća i 2 berze.

Prikupljanje i obrada ovih podataka vrši se u skladu s međunarodnom metodologijom propisanom u Priručniku za monetarnu i finansijsku statistiku Međunarodnog monetarnog fonda (2000), putem standardizovanih izvještajnih obrazaca 2SR za banke i 4SR za nebankarske finansijske institucije (Standardized Report Forms – SRF). Primjenom jedinstvenih izvještajnih obrazaca za prikaz bilansa stanja omogućava se izrada agregiranih i međusobno uporedivih (harmonizovanih) podataka na nivou Bosne i Hercegovine.

Broj finansijskih institucija u BiH

Finansijske institucije u BiH	dec-24			jun-25			dec-25		
	FBiH	RS	Ukupno	FBiH	RS	Ukupno	FBiH	RS	Ukupno
Banke*	14	8	22	14	8	22	14	8	22
Društva za osiguranje i reosiguranje	11	14	25	11	14	25	11	14	25
Mikro kreditne organizacije	13	16	29	13	14	27	13	14	27
Investicioni fondovi	21	16	37	22	17	39	22	19	41
Lizing društva	4	0	4	4	0	4	4	0	4
Brokerske kuće	2	4	6	2	4	6	2	4	6
Berze	1	1	2	1	1	2	1	1	2
Ukupno	66	59	125	67	58	125	67	60	127

* Uključena Razvojna banka FBiH

Ukupna aktiva finansijskog sektora BiH na kraju 2025. godine iznosila je 57,01 milijardu KM, što predstavlja rast od 4,83 milijarde KM ili 9,3% u odnosu na kraj 2024. godine. U odnosu na polugodište 2025. godine, zabilježen je rast od 5,9%, što ukazuje na stabilan uzlazni trend tokom cijele godine.

Bankarski sektor zadržao je ključnu ulogu i dominantnu poziciju u finansijskom sistemu, sa aktivom od 49,93 milijarde KM i učešćem od 87,6% ukupne aktive. U odnosu na kraj 2024. godine, banke su ostvarile rast od 9,1%, dok je rast u drugoj polovini 2025. godine iznosio 6,3%. Ovakva kretanja potvrđuju da bankarski sektor i dalje predstavlja nosioca finansijske stabilnosti i kreditne aktivnosti u zemlji.

Ukupno posmatrano, finansijski sektor BiH u 2025. godini karakteriše stabilan i široko zasnovan rast, pri čemu su gotovo svi segmenti, osim brokerskih kuća, zabilježili povećanje aktive. Ipak, struktura sektora ostaje izrazito koncentrisana u bankarskom segmentu, dok razvoj nebankarskih finansijskih institucija, posebno investicionih fondova i mikrokreditnih organizacija, ukazuje na postepenu diversifikaciju finansijskog sistema.

Finansijski sektor u BiH (milioni KM)

Finansijske institucije u BiH	12/2024		06/2025		12/2025		Indeks rasta aktive	
	<i>Aktiva</i>	<i>Udio (%)</i>	<i>Aktiva</i>	<i>Udio (%)</i>	<i>Aktiva</i>	<i>Udio (%)</i>	<i>12.2025/12.2024</i>	<i>12.2025/06.2025</i>
<i>Banke</i>	45.781,6	87,7	46.990,8	87,6	49.932,0	87,6	109,1	106,3
<i>Društva za osiguranje i reosiguranje</i>	2.798,7	5,4	2.948,8	5,6	2.968,9	5,2	106,1	100,7
<i>Mikrokreditne organizacije</i>	1.757,5	3,4	1.864,2	3,3	2.012,8	3,5	114,5	108,0
<i>Investicioni fondovi</i>	1.139,2	2,2	1.244,9	2,1	1.311,8	2,3	115,2	105,4
<i>Lizing društva</i>	682,3	1,3	741,6	1,3	762,0	1,3	111,7	102,8
<i>Brokerske kuće</i>	8,5	0,0	8,7	0,0	8,3	0,0	97,6	95,1
<i>Berze</i>	11,0	0,0	11,5	0,0	11,0	0,0	100,4	96,0
Ukupno za sektor	52.178,7	100,0	53.810,5	100,0	57.006,8	100,0	109,3	105,9

Sektor nebankarskih finansijskih institucija (sektor OFI)


Ukupna aktiva sektora Ostalih finansijskih institucija (OFI) u Bosni i Hercegovini na kraju 2025. godine iznosila je 7,07 milijardi KM. Najveće učešće u ukupnoj aktivni sektora OFI i dalje imaju društva za osiguranje i reosiguranje, čija je aktiva iznosila 2,97 milijardi KM ili 42,0% ukupne aktive sektora OFI.

Mikrokreditne organizacije zauzimaju drugo mjesto po veličini aktive sa 2,01 milijardom KM, odnosno 28,5% ukupne aktive sektora OFI, što potvrđuje njihov značajan položaj u nebankarskom finansijskom sektoru. Investicioni fondovi su ostvarili aktivu od 1,31 milijardu KM i učestvuju sa 18,5% in ukupnoj aktivni sektora OFI, dok su lizing društva sa aktivom od 762,0 miliona KM učestvovala sa 10,8%.

Najmanje učešće u ukupnoj aktivni sektora OFI imaju brokerske kuće i berze, čija je zajednička aktiva iznosila 19,3 miliona KM ili 0,3% ukupne aktive sektora OFI.

Posmatrano po strukturi aktive, sektor OFI i dalje karakteriše dominantno učešće društava za osiguranje i reosiguranje, dok rast aktive mikrokreditnih organizacija i investicionih fondova ukazuje na nastavak razvoja i postepeno jačanje nebankarskog finansijskog sektora u Bosni i Hercegovini.

Učešće nebankarskih finansijskih institucija u sektoru OFI na kraju 2025. godine



U nastavku je data kratka analiza tri podsektora s najvećim učešćem u sektoru OFI.

Društva za osiguranje i reosiguranje

Na tržištu osiguranja u Bosni i Hercegovini, na kraju 2025. godine poslovala su 24 društva za osiguranje i jedno društvo za reosiguranje, od čega je 15 društava obavljalo djelatnost neživotnog osiguranja, dok je 9 društava poslovalo kao kompozitna društva koja obavljaju poslove životnog i neživotnog osiguranja.

Sektor osiguranja i reosiguranja zadržao je najveće učešće unutar sektora Ostalih finansijskih institucija (OFI), sa udjelom od oko 42,0% ukupne aktive sektora OFI. Bilansna suma sektora osiguranja i reosiguranja na dan 31.12.2025. godine iznosila je 2,97 milijardi KM i veća je za 170,2 miliona KM ili 6,1% u odnosu na kraj 2024. godine. U poređenju sa stanjem na kraju prvog polugodišta 2025. godine, aktiva sektora povećana je za 20,1 milion KM ili 0,7%.

Najznačajnije učešće u strukturi aktive i dalje imaju vrijednosni papiri, koji su na kraju 2025. godine iznosili 898,8 miliona KM, odnosno 30,3% ukupne aktive sektora osiguranja. U odnosu na kraj 2024. godine ulaganja u vrijednosne papire povećana su za 61,8 miliona KM ili 7,4%, što potvrđuje nastavak rasta investicija u dužničke vrijednosne papire, prvenstveno u entitetske obveznice.

Značajan udio u aktivni imali su i valuta i depoziti – prvenstveno oročeni depoziti kod banaka – u iznosu od 711,4 miliona KM, kao i nefinansijska aktiva, uglavnom nekretnine, u vrijednosti od 654,7 miliona KM.

U strukturi pasive dominantno mjesto i dalje zauzimaju bruto tehničke rezerve osiguranja, koje su na kraju 2025. godine iznosile 1,95 milijardi KM i činile 65,6% ukupne pasive sektora. U odnosu na kraj 2024. godine tehničke rezerve povećane su za 105,1 milion KM ili 5,7%, što ukazuje na nastavak rasta osiguravajućih obaveza i stabilnosti sektora.

Kapital društava za osiguranje i reosiguranje iznosio je 651,1 milion KM, odnosno 21,9% ukupne pasive, te je u odnosu na kraj prethodne godine povećan za 30,7 miliona KM ili 4,9%.

Ukupno posmatrano, sektor osiguranja i reosiguranja u 2025. godini nastavio je stabilan rast aktive i ulaganja tehničkih rezervi u vrijednosne papire, čime je zadržao značajnu ulogu u nebankarskom finansijskom sektoru Bosne i Hercegovine.

Mikrokreditne organizacije u BiH

Ukupna aktiva mikrokreditnih organizacija u Bosni i Hercegovini na kraju 2025. godine iznosila je 2,01 milijardu KM i veća je za 255,3 miliona KM ili 14,5% u odnosu na kraj 2024. godine. U poređenju sa stanjem na kraju prvog polugodišta 2025. godine, aktiva mikrokreditnih organizacija povećana je za 148,6 miliona KM ili 8,0%, što potvrđuje nastavak snažnog rasta ovog segmenta finansijskog sektora.

Od ukupne aktive mikrokreditnih organizacija, na mikrokreditna društva (MKD) odnosilo se 1,28 milijardi KM ili 63,5%, dok se na mikrokreditne fondacije (MKF) odnosilo 735,1 milion KM ili 36,5% ukupne aktive sektora.

Ukupan iznos plasiranih kredita mikrokreditnih organizacija na kraju 2025. godine iznosio je 1,66 milijardi KM, što predstavlja 82,5% ukupne aktive. U odnosu na kraj 2024. godine, kreditni portfolio povećan je za 209,2 miliona KM ili 14,4%, dok je u odnosu na kraj prvog polugodišta 2025. godine zabilježen rast od 111,5 miliona KM ili 7,2%. Navedeni podaci potvrđuju da krediti i dalje predstavljaju dominantan oblik aktive mikrokreditnih organizacija.

Pored kredita, značajnije stavke aktive činili su valuta i depoziti u iznosu od 114,8 miliona KM, nefinansijska aktiva od 130,5 miliona KM, te dionice i drugi kapital sa 73,9 miliona KM.

Na strani pasive, osnovni izvor finansiranja mikrokreditnih organizacija i dalje predstavljaju obaveze po kreditima, koje su na kraju 2025. godine iznosile 1,08 milijardi KM ili 53,5% ukupne pasive. U odnosu na kraj 2024. godine, obaveze po kreditima povećane su za 160,1 milion KM ili 17,5%, dok su u odnosu na kraj juna 2025. godine veće za 95,0 miliona KM ili 9,7%.

Ukupni kapital mikrokreditnih organizacija na kraju 2025. godine iznosio je 666,6 miliona KM i činio je 33,1% ukupne pasive. U poređenju sa krajem 2024. godine kapital je povećan za 62,4 miliona KM ili 10,3%, dok je u odnosu na kraj prvog polugodišta 2025. godine zabilježen rast od 34,8 miliona KM ili 5,5%.

Ukupno posmatrano, mikrokreditne organizacije su tokom 2025. godine nastavile trend rasta aktive, kreditnog portfolija i kapitala, pri čemu krediti stanovništvu i dalje predstavljaju dominantnu djelatnost ovog sektora. Rast kreditne aktivnosti i povećanje izvora finansiranja ukazuju na daljnje jačanje uloge mikrokreditnih organizacija u finansiranju stanovništva i manjih poslovnih subjekata u Bosni i Hercegovini.

Investicioni fondovi

Ukupna aktiva investicionih fondova na kraju 2025. godine iznosila je 1,31 milijardu KM i bilježi nastavak rasta u odnosu na prethodni period. Najveći dio aktive investicionih fondova odnosio se na portfolio ulaganja, koji je iznosio približno 1,27 milijardi KM i činio dominantan dio ukupne aktive fondova.

U strukturi ulaganja investicionih fondova najveće učešće imali su dužnički vrijednosni papiri u iznosu od 499,0 miliona KM, odnosno 39,4% ukupnog portfolija ulaganja. Značajno učešće imali su i vlasnički vrijednosni papiri sa 474,4 miliona KM ili 37,5%, što ukazuje na značajnu zastupljenost ulaganja na tržištu kapitala.

Depoziti su iznosili 257,5 miliona KM i učestvovali su sa 20,3% u ukupnim ulaganjima investicionih fondova, što pokazuje da fondovi dio sredstava drže u likvidnijim i manje rizičnim oblicima ulaganja.

Ulaganja u nekretnine iznosila su 26,7 miliona KM ili 2,1% ukupnog portfolija, dok su zajmovi imali najmanje učešće, sa iznosom od 7,9 miliona KM odnosno 0,6%.

Posmatrano po strukturi ulaganja, investicioni fondovi su najveći dio sredstava usmjeravali u vrijednosne papire, prvenstveno dužničke i vlasničke, što potvrđuje dominantnu investicionu orijentaciju fondova prema tržištu kapitala i finansijskim instrumentima.

